

獨
醉
亭
集

欽定四庫全書

獨醉亭集卷下

明 史謹 撰

五言絕句

蘭竹圖

采采石上蘭蕭蕭水邊竹各抱夷齊心清風激流俗

題竹

窓戶晝蕭森空階凝綠陰不緣冰雪裏焉識歲寒心

題畫

樹擁溪邊閣山浮雨後嵐白頭歸未得畫裏看江南

題玩月仕女

獨立長門裏徘徊無所親可憐前殿月不照後宮人

觀花有感

澗畔花無數榮枯各有時先開復先謝莫羨向陽枝

題雪景

寒樹老空山雲根碧蘚斑野船纔近岸疑向剡溪邊

題畫

古樹雲烟合遙山紫翠浮
白頭林下客應伴赤松游

鴛鴦圖

頭白兩文禽和鳴多好音
韓朋墳上樹雙宿到如今

題畫

林壑晝冥冥松蘿覆野亭
一塵飛不到門外數峰青

七言絕句

春山行樂圖

四海無波六合清諸公乘暇樂昇平
杏花村外東風裏
醉拂吟鞭並轡行

奉天殿朝回

春風淡蕩御烟微玉珮成行柳下歸
共浴恩波還共散
紫薇花下換朝衣

直房聞桂香

松陰池館晝偏涼何處飄來桂子香
起傍雕闌看秋色
廣寒宮殿近昭陽

曉望鍾山

勢蟠龍虎翠高低樹色蒼蒼接鳳池宿霧漸消雲散盡
金烏飛上萬年枝

過虎踞關

關路盤盤繞翠微巖花澗草競春輝晚來醉拂吟鞭過
山氣濛濛欲染衣

題捕魚圖

罷釣歸來日已昏荻花吹雪暗江村此生不是甘貧賤

留得清風遺子孫

送鄧太守

典郡曾為百里侯
中心元只慕伊周
今朝五馬西南去
重使三苗識鄧攸

立春日試筆

蒼蒼初日照樓臺
元氣淋漓遍九垓
不是梅花露消息
人間何處識春來

蜀山道中

盤盤鳥道接峨眉
劍閣橫空北斗低
羈思不堪過半夜
萬山深處一猿啼

過瀼西

天涯春盡強提攜
百丈牽江過瀼西
誰識少陵憂國恨
東風處處杜鵑啼

過巫山

一劍長懸萬里身
偶經巫峽又逢春
路傍多少娉婷女
誰是襄王夢裏人

白帝城晚眺

城郭荒涼秋氣深江山如畫一登臨中原自有劉文叔
應笑公孫錯用心

題墨葡萄

誰寫秋風月下枝摩挲醉墨尚淋漓白頭常侍心中事
只有涼州刺史知

中秋夜對月

一池樹影壓青天萬籟無聲月正圓多少詞臣爭折桂

不知誰在卻說先

宣和金桃鸚鵡圖

葉底金桃似彈懸隴禽雙啄味初全
披圖自識宣和筆
流落人間幾百年

竹枝便面

廣寒宮裏碧琅玕
葉葉清風起暮寒
自有凌霜高節在
敲門未許俗人看

得家書

萬里來從青海頭
開封未讀淚先流
書中不盡心中事
只恐看時我更愁

題南楚才妻寫容寄夫圖

欲整雲鬟意轉慵
却調花露寫芳容
慙寄與天涯客
休作陽臺夢裏逢

題琅邪山圖

綠樹陰陰石徑斜
諸峰羅立帶琅邪
雲深亭觀知多少
誰是廬陵太守家

題馬圖

猛氣如雲不受羈時清放牧華山西自憐今日無人顧
空向奚奴振鬣嘶

送陳士常

蕭蕭行李出邊城曙色初分柳外亭今日送君翻愧我
劍鋒磨盡尚飄零

客夜

雁叫寒空月滿江無邊鄉思正難降西風不待人驅遣

又送秋聲入夜窓

題畫

平湖雨過水雲腥暑氣全消

原闕

亭野老放船何處去

不知山色上衣青

桃葉渡

重經古渡立斜曛愁見桃花兩岸春
欲向東風唱桃葉江邊怕有別離人

九日

烏帽籠頭髮似銀
厭騎羸馬踏紅塵
今朝又醉秦淮酒
共插黃花少故人

湘江夜泊

扁舟載月下三湘
露渚風來杜若香
一片秋聲無處著
和愁散入水雲鄉

湘潭縣

石田茅屋路東西
乘興還堪一杖藜
雲氣忽來山不見
滿林春雨鷓鴣啼

黃陵廟阻風

黃沙捲霧暗前灘
風吼雷聲控百蠻
此處波濤原自異
祖龍何必赭其山

九日

病骨秋來似凍蠅
好山空憶去年登
今朝對景成惆悵
勉上西樓第一層

碧闌干外楚江濱
一片秋光雨後新
多少登高林下客
不知誰是去年人

題碧桃錦鳩圖

一枝和露倚琅玕
髣髴玄都雪後看
何處飛來雙野鳥
花間喚雨立春寒

曉過洞庭湖

渺渺湖光接素秋
雁聲嘹唳滿汀洲
孤舟喚醒還家夢
楓葉蘆花一片愁

午日瞿塘觀競渡

龍舟一葉戲蒼茫
畫楫齊操忽怒瀧
俄頃翻身葵魚腹

醉魂慙訴汨羅江

聞猿

幾處空山嘯月明不堪聞過兩三聲
誰知萬里南遷客
一夜孤舟夢不成

聞子規

聲聲何苦勸人歸
不管行人聽轉悲
十二峰前雲樹裏
幾番啼到月明時

題畫